

## Morning Regional Dogri News Bulletin, 27<sup>th</sup> September 2024

मार्निंग डोगरी न्यूज़ बुलेटिन, समें. 09-20 Hrs



### Headlines

- जम्मू खित्ते दे 11 विधानसभा हल्के च त्रीए गेड़ तैहत मतदान होना ऐ। 1 ज्हार 494 मतदान केन्द्रें च 12 लक्ख थमां बद्ध मतदाता वोट पाने दे अपने हक्कै दा इस्तेमाल करगंन।
- पैहली अक्तूबर गी त्रीए गेड़ तैहत होने आले चुनाएं लेई प्रचार जोरें शोरें कन्नै जारी बक्ख-बक्ख सियासी पार्टिएं दे नेता चुनां प्रचार करा'रदे न।
- केन्द्र सरकार नै मैहगाई भत्ते च पैहली अक्तूबर थमां नमीं मजदूरी दरें गी लागू करने दी घोषणा कीती ऐ।
- मुख सचिव अटल डुल्लू होरें बड़ी मती महत्वै आली आवास योजनाएं पर चला'रदे कम्में दी समीक्षा करने आस्तै बैठक दी अध्यक्षता कीती।



### Final Phase Voting

जम्मू जिले दे 11 विधानसभा हल्के च त्रीए गेड़ तैहत मतदान होना ऐ। 12 लक्ख थवां मतदाता वोट पाने दे अपने अधिकार दा इस्तेमाल करडन। जम्मू दे जिनें 11 विधानसभा हल्के च वोट पाए जाडन, उंदे च बिश्नाह, सुचेतगढ़, बाहु, जम्मू ईस्ट, नगरोटा, जम्मू वेस्ट, जम्मू नार्थ, मढ़, अखनूर ते छम्ब शामिल न। कुल 12 लक्ख 977 मतदाता न जिंदे च 6 लक्ख 19 ज्हार 66 मर्द, 5 लक्ख 81 ज्हार 887 महिलां ते 24 थर्ड जेंडर मतदाता न। चुनाएं गी रमानदारी आले ढंग्गै सिर करोआने लेई भारतीय चुनां आयोग आस्सेया 1 ज्हार 494 मतदान केंद्र बनाए गेदे न जिंदे चा 609 शैहरी इलाकें च ते 885 ग्रामीण इलाकें च कायम कीते गए न। मतदाताएं दी हिस्सेदारी गी बदाने लेई पीडब्ल्यूडी लेई पिक पोलिंग स्टेशन, युवाएं आस्सेया संचालित मतदान केंद्र, ग्रीन पोलिंग स्टेशन कायम कीते गए न। त्रीए गेड़ तैहत मतदान पैहली अक्तूबर गी होगं मतदाताएं गी जागरूक करने लेई कई सारे कार्यक्रम चलाए जा'रदे न।



## Profile Udhampur East

जम्मू कश्मीर च होआरदे विधानसभा चुनाएं दे त्रीए ते खीरले गेड़ लेई प्रचार जोरें शोरें पर ऐ। हर इक सियासी पार्टी दा मेदवार मतदाताएं गी अपने पक्ख च करने आस्तै पूर जोर कोशशां करा'रदा ऐ। पैहली अक्तूबर गी त्रीए गेड़ तैहत होने आले विधानसभा चुनाएं दरान 40 विधानसभा सीटें पर मतदान होग। उधमपुर जिले दे उधमपुरईस्ट हल्के च बी इस्सै गेड़ च मतदान होग। उधमपुर जिले च कुल आबादी 5 लक्ख 57 ज्हार 689 ऐ, जेहदे च 2 लक्ख 98 ज्हार 189 मर्द ते 2 लक्ख 59 ज्हार 5 सौ महिला न। जिले च कुल 4 लक्ख 22 ज्हार 298 पंजीकृत मतदाता न। जिंदे चा 2 लक्ख 21 ज्हार 262 मर्द, ते 2 लक्ख इक ज्हार 35 महिला मतदाता न। चुनां आयोग नै लोकतांत्रिक प्रक्रिया गी सूचारू ढंगै सिर चलाने ते मतदाताएं दी सहूलत लेई 654 मतदान केन्द्र कायम कीते न। तां जे हर मतदाता वोट पाने दे अपने अधिकार दा इस्तेमाल करी सकै। जिले च 357 ग्रां, 236 पंचैतां, 17 समुदायिक विकास ब्लाक, 8 तैहसीलां ते 4 सब-डिवीजन न। उधमपुर च 4 विधानसभा हल्के न जेहड़े प्रमुख मेदवार इस गेड़ च चुनां मैदान च न, उंदे च एनसी-कांग्रेस दे मेदवार सुनील वर्मा, बीजेपी दे मेदवार राजेन्द्र सिंह पठानिया, जेकेपीडीपी दे बागेल सिंह, बीएसपी दे अचव सिंह, नैशनल पैथर्स पार्टी दे बलवान सिंह ते शिव सेना दे साहिल गंडोत्रा शामिल न। एहदे इलावा पवन खजूरिया, सोमा ते मोहिन्द्र सिंह आजाद मेदवार दे तौर पर चुनां लड़ा'रदे न।



## PM Rally

जम्मू कश्मीर च त्रीए ते खीरले गेड़ दे विधानसभा चुनाएं गी दिक्खदे होई प्रधानमंत्री नरेन्द्र मोदी होर कल जम्मू दा दौरा लांगन ते मौलाना आजाद स्टेडियम च इक बड्डी रैली गी संबोधत करगंन। इस रैली लेई तैआरियां जोरें शोरें कन्नै जारी ऐ। मौलाना आजाद स्टेडियम गी मोदी हुंदी रैली लेई चुनेआ गेआ ऐ, इसी पूरी चाल्ली सील करी दित्ता जाग ते रैली शुरू होने तगर कुसै गी अंदर नेई जान दित्ता जाग। सुरक्षा दे बी पुख्ता बंदोबस्ते कीते गे न। त्रीए ते खीरले गेड़ दे चुनां पैहली अक्तूबर गी होने न। जम्मू जिले च इस गेड़ तैहत 11 विधानसभा हल्के पर मतदान होग। कांग्रेस दे वरिष्ठनेता ते एआईसीसी दे जम्मू कश्मीर प्रभारी होरें दस्सेआ ऐ जे कांग्रेस यानि 27 सितम्बर गी 2 रेलियां करगंन जिसलै कि पार्टी नेता प्रियंका गांधी होर 28 सितम्बर गी रेलियां करगंन।



## BJP Congress

भारतीय जनता पार्टी दे वरिष्ठ नेता ते केन्द्रीय गृह मंत्री अमित शाह होरें कटुआ च इक चुनावी रैली गी संबोधत कीता। उनें आखेआ जे जेहड़े बी आतंकवादी जम्मू कश्मीर च सक्रिय न, उनेंगी इस बत्ता ते थेआरें गी छोड़ियै सरकार कन्नै गल्लबात आस्तै अगगे औना लोड़चदा। जेकर एह लोक आतंकवाद आला रस्ता नेई छोड़गंन तां फही सुरक्षाबलें आस्सेआ उंदा सफायाकरी दित्ता जाग। उनें आखेआ जे जम्मू कश्मीर च बीजेपी नै लोकतंत्र गी जमीनी सतह पर मजबूत कीता ऐ। जेहड़ा हुन विकास दी बत्ता पर अगड़ा बधा'रदा ऐ। जम्मू कश्मीर गी त्रै थमां बद्ध दाहकें तगर आतंकवाद करी मता किश झल्लना पेआ। कांग्रेस पार्टी दे राज्यसभा थमां सांसद राजीव शुक्ला होरें कल जम्मू च मीडिया कर्मिणं गी संबोधत कीता। उनें आखेआ जे एह चुनां जम्मू कश्मीर दे लोकें लेई इक मौका ऐ जेहदे राण ओह मजबूत ते साफ सनेहा मतदान राण देइ सकदे न। उनें आखेआ जे जम्मू कश्मीर दा राज्य दा दर्जा बिजन चिर लाए दे वापस कीता जाना लोड़चदा।



## Kathua

कटुआ च औंदे विधानसभा गी दिक्खदे होई स्वीप कार्यक्रम तैहत बक्ख-बक्ख चाल्ली दिणं गतिविधिणं दा आयोजन कीता जा'रदा ऐ तां जे लोकें मतदान प्रक्रिया आस्तै जागरूक कीता जाई सकै। इनें कार्यक्रमें दा मकसद मतदाताएं गी गी प्रेरित करना ऐ जे ओह मतदान प्रक्रिया च बधी-चढ़ियै हिस्सा लैन। स्वीप अभियान तैहत इक खास कार्यक्रम दा आयोजन कटुआ च करोआया गोआ जेहदे च विद्यार्थिणं बधी-चढ़ियै हिस्सा लैता ते बक्ख-बक्ख चाल्ली दी गतिविधिणं दा प्रदर्शन कीता, जिंदे च पोस्टर बनाने दी प्रतियोगिता बी शामिल ही। विद्यार्थिणं विधानसभा चुनां सरबंधी पोस्टर बनाए ते उनें पोस्टरें राण मतदान दे महत्व बारे लोकें गी जानकार बनाया गोआ जे ओह चुनां प्रक्रिया च अपनी शमूलियत गी जकीनी बनान। आकाशवाणी दे संवाददाता कन्नै गल्लबात करदे होई युवा वोटरें गलाया.....



## DEO Kathua

औंदे विधानसभा चुनाणं बारे जागरूकता पैदा करने लेई स्वीप तैहत जिला जसरोटा ते हीरानगर विधानसभा हल्के च नुक्कड़ नाटक दा सरिस्ता कीता गोआ। एहदा मकसद मतदाताएं गी जागरूक बनाना हा। जम्मू दे मशहूर नटरंग समूह दे कलाकारें बेहतरीन प्रदर्शन कीता। कलाकारें दिणं प्रस्तुतिणं उत्थें मजूद लोकें दा मन मोही लैता। इनें नुक्कड़ नाटकें राण मतदाताएं गी मतदान प्रक्रिया बारे जागरूक कीता गोआ। एहदे कन्नो कन्नी उनेंगी वोटें दी खरीद फरोख्त आली माड़ी कबैतु थमां बी सौहगा कीता गोआ।



## Central Govt. Minimum Wages

केन्द्र सरकार नै मेंहगाई भत्ते च संशोधन करियै मजदूरी दिएं घट्टोघट्ट दरें च बाद्धे दी घोषणा कीती ऐ। उजरत दिएं नमिएं दरां अगले म्हीने 1 अक्तूबर थमां लागू होई जांगन। संशोधन मगरा अकुशल श्रमिकें लेई न्यूनतम मजदूरी दर 783 रपे, अद्धे कुशल श्रमिकें लेई 868 रपे ते कुशल मजदूरी लेई ध्याड़ी 954 रपे होग। बड़े मते कुशल मजदूरें लेई संशोधन ध्याड़ी 1 ज्हार 35 रपे होग।



## Chief Secretary

मुख्य सचिव अटल डुल्लू होरें बड़ी मती महत्त्वै आली आवास योजना पर चला'रदे कम्में दी समीक्षा करने आस्तै इक बैठक च घरै—मकाने ते शैहरी विकास मैहकमे गी जम्मू कश्मीर दी शैहरी आबादी गी सस्ती आवास सुविधां उपलब्ध करोआने लेई होर मता ध्यान देने लेई जोर भरेआ। मुख्य सचिव होरें आखेआ ऐ जे कीते शैहरी इलाकें दी आबादी तेजी कन्नै बधदी जा'रदी ऐ इस करियै शैहरें च रौहने आस्तै घरें दी मंग च बाद्धा होआ'रदा ऐ। उनें दस्सेआ जे मैहकमे आस्सेआ सब्बने थमां पैहले उनें लोकें गी घर उपलब्ध करोआना ऐ जेहड़े शैहरें च मते गरीब लोक रौहदे न। मुख्य सचिव होरें आखेआ जे शैहरें च घरै दे निर्माण कम्म पैहले शा चला'रदे न जे उनेंगी जोर भरियै आखेआ ऐ जे एह निर्माण कम्म तौले शा तौले मुकम्मल करन। उनें इब्बी आखेआ ऐ जे शैहरें च रौहने आले लोकें गी एह सुविधा उपलब्ध करोआना मैहकमे दी जिम्मेदारी ऐ।



## LG Sinha SKUAST

उपराज्यपाल मनोज सिन्हा होरें कल राजभवन जम्मू च स्कास्ट जम्मू दी 20मीं विश्वविद्यालय परिषद दी बैठक दी अध्यक्षता कीती। मनोज सिन्हा होरें उत्पादकता च बाद्धा करने लेई शोध ते नवाचार गी लैब थमां मैदान च लेई जाने दे कन्नै कन्नै राईबाई दे खेत्तर च मुख्य चुनौतिएं कन्नै निबड़ने उप्पर बी बचार कीता। उपराज्यपाल होरें जोर देइयै आखेआ ऐ जे विश्वविद्यालय गी आधुनिक ते टिकाऊ राईबाई गी अपनाना चाहिदा ते करसान समुदाय कन्नै रलियै राईबाई गी विकसित करने ते ई—दपतर गी लागू करने उप्पर मता ध्यान देना लोड़चदा। काउंसिल नै इस बैठक दरान पैदा कीते दे बक्ख—बक्ख योजनाएं गी मंजूरी देई दित्ती।



## DEO Kishtwar

किश्तवाड़ दे जिला चुनां अधिकारी राजेश कुमार शवन ते एसएसपी अब्दुल क्यूम होरें विधानसभा चुनाएं दी मतगणना लेई प्रस्तावित केन्द्र दा दौरा लाया। उनें केन्द्रीय विद्यालय च बनाए गेदे स्ट्रांग रूम दा जायजा लैता जित्थें हाल च होए दे मतदान मगरा ईवीएम गी रखेआ गेदा ऐ। इस दरान रजिस्टर सीसीटीवी कैमरें ते नियंत्रण कक्ष दा जायजा लैता गेआ। जिला चुनां अधिकारी होरें 24 घैंटे सख्त निगरानी जकीनी बनाने पर जोर पाया। उनें इस प्रक्रिया गी सुचारू ते पारदर्शी ढंगै सिर तोड़ चाढ़ने लेई सारे इंतजाम दा जायजा लैता।



## SVEEP Jammu

जम्मू विश्वविद्यालय दे सेंद्रल पार्क च कल इक बड़डे पैमाने उप्पर सांस्कृतिक स्वीप कार्यक्रम दा आयोजन कीता गेआ जेहदा मकसद जिले च ओंदे पैहली अक्टूबर दे चुनाएं लेई मतदाताएं दी शमूलियम गी बढ़ावा देना हा। इस कार्यक्रम च लोकप्रिय संगीतकारें अपनियां प्रसतुतियां पेश कीतियां। बड़ी मती गिनतरी च विद्यार्थिं इस कार्यक्रम च हिस्सा लैता। इस कार्यक्रम च खास करियै नोजवानें गी मतदान प्रक्रिया च सक्रिया तौरा पर हिस्सा लैने लेई आखेआ गेआ। जिला चुनां अधिकारी सचिन कुमार वैश्य होरें मतदान दे महत्व उप्पर जोर भरेआ ते मतदाताएं गी मती गिनतरी च हिस्सा लैने लेई आखेआ खास करियै जिनें पैहली बारी वोट पाने न। उनें लोकें गी इब्बी भरोसा दोआया ऐ जे मतदान केन्द्रें च सब्बै लोड़चदे इंतजाम कीते गेदे न।

